

DOMINGU IV TEMPU KUAREZMA – TINAN A

Tema

Leitura sira Domingu ne'e nian propoin mai ita tema "naroman" nian hodi define esperiénsia sarani nu'udar "moris iha roman".

Iha *Evanjellu*, Jezús apresenta an nu'udar "mundo nia roman"; ninia misaun mak liberta ema sira husi nakukun egoízmu nian, foti-an nian no autosufisiénsia nian. Adere ba Jezús nian proposta katak tuir dalan liberdade no realizasaun nian ne'ebé lori ba moris nakonu. Husi Jezús nia asaun moris Ema Foun.

Iha *leitura daruak*, Paulo propoin ba sarani sira Éfeso nian atu hili "naroman". Iha konkreto, Paulo esplika katak moris iha "naroman" katak pratika Maromak nia obra sira (Iaran-di'ak, justisa no lialoos).

Leitura dahulku la refere direktamente ba tema "naroman" nian. Maski nune'e, nia haktuir kona-ba Na'i ne'ebé hili David nu'udar liurai Israel nian no ninia unsaun. Leitura ne'e lori ita atu reflète kona-ba ita-nia unsaun iha loron Batizmu nian ne'ebé halo ita sai sasin Maromak nia "roman" nian iha mundu.

LEITURA I – 1 Sam 16,1b.6-7.10-13a

Iha sék. XI mK nia rohan, filisteu sira sai ameasa boot ba tribu sira Maromak nia Povu nian. Filisteu sira hakarak okupa rai sira ne'ebé Maromak nia Povu hela bá. Tanba nesesidade ba lideransa ida mesak no forte halo atu katuas sira tribu nian tau hamutuk kbiit iha uniaun polítika ho liurai ida nia autoridade nia okos, hanesan buat ne'ebé akontese ho povu seluk.

Esperiénsia monárkika dahuluk akontese ho Saúl ne'ebé tau hamutuk tribu sira sentru nian no tribu balun tasi-feto nian. Esperiénsia ne'e remata ho forma dramátika: Saúl no nia oan-mane Jónatas mate iha funu Gelboé nian, iha luta kontra filisteu sira, iha tinan ±1010 mK.

Presiza hetan fali "asua'in" seluk, ho kbiit atu hamosu konsensu ente tribu lahanesan, tau sira hamutuk no gia sira atu manán funu kontra inimigu filisteu sira. Katuas sira nia hilin – sira husi tasi-feto, nune'e mós tribu tasi-mane nian – monu ba foin-sa'e ida naran David.

David moris iha tinan ±1040 mK, iha Belém Judá nian (tasi-mane). Oinsá mak David sai famozu no lori solusaun ba problema liurai nian?

Livru Samuel nian apresenta solusaun tolu kona-ba oinsá David envolve an. Ida uluk nia apresenta David nu'udar funu-na'in maka'as ne'ebé dada Saúl nia atensaun, liuliu bainhira nia manán gigante filisteu Golias (kf. 1 Sm 17). Tradisaun daruak apresenta David nu'udar poeta ida, ne'ebé bá iha Saúl nia kadunan atu hananu no toka arpa (atu fó hakmatek ba Saúl ho ninia múzika – kf. 1 Sm 16,14-23). Neineik-neineik, poeta/kantór David manán simpatizante iha kadunan, hodi sai Jónatas nia belun, no kaben ho liurai nia oan-feto Mical). Ikusnian, tradisaun datoluk – labele verifika iha istória, maibé ho importánsia teolójika boot – apresenta David ninia ukun nu'udar Jahwéh nia hilin. Ita-nia testu apresenta tradisaun datoluk ne'e.

MENSAJEN

Ita-nia testu apresenta reflesaun ida ne'ebé autór elabora di'ak kona-ba eleisaun. Autór hakarak apresenta katak Maromak nia lójika diferente liu husi ema nia lójika. Jahwéh no

nafatin Jahwéh mak hili David no ema sira ne'ebé nia hakarak konfia misaun ida. Ba Samuel mós – Maromak nia manu-ain – Jahwéh la fó esplikasaun ruma. Eleisaun la'ós rezultadu inisiativa ema nian, maibé mai husi Maromak nia inisiativa no vontade livre.

Hafoin ita haree oinsá Maromak nia lójika iha ninia hilin. Samuel rasiosina ho ema nia lójika no hakarak kose mina nu'udar liurai, Jessé husi Belém nia oan-mane boot, tanba nia laran hakfodak no ninia oin furak no estatura; maibé ida-ne'e la'ós Maromak nia hilin... Samuel komprende, ikusmai, katak Maromak hili David – Jessé nia oan ikun – foin-sa'e anónimu no deskoñesidu ne'ebé hein nia aman nia bibi sira.

Istória eleisaun David nian hakarak subliña Maromak nia lójika, ne'ebé la haree ema nia méritu, ema nia oin eh ema nia qualidade umana sira ne'ebé baibain impresiona ema sira. Dalabarak Nia hili mak ema ki'ik sira, ema sira fraku liu, sira ne'ebé mundu tau iha ninin no konsidera insignifikante; no liuhusi sira mak Maromak hala'o nia obra iha mundu.

Nune'e, sai klaru mai ita katak ema mak instrumentu de'it atu Maromak realiza nia obra iha mundu.

LEITURA II – Ef 5,8-14

Surat ba Efésos mak, provavelmente, ezeplár ida “surat sirkulár” nian ne'ebé haruka ba kredo oioin Ázia Menór nian, iha altura ida iha-ne'ebé Paulo iha kadeia (iha Roma?). Nia portador mak ema ida hanaran Tíquico. Ita iha tinan sira entre 58/60.

Ema balun haree iha surat ida-ne'e sínteze ida teolojia paulina, iha altura ida iha-ne'ebé apóstolu nia misaun iha lorosa'e/oriente remata ona no la hatene ninia futuru sei oinsá (tanba altura ne'e nia iha kadeia no la hatene oinsá mak sei remata).

Tema sentrál Surat ba sarani sira iha Éfeso mak buat ne'ebé Paulo hanaran “mistériu”: Maromak nia projetu salvasaun nian, ne'ebé horiuluk kedas define, subar ba ema sira durante tempu barak. Maromak nia projetu salvasaun ne'e hatudu sai ba ema sira no konkretiza liuhusi Jezús, komunika ba apóstolu sira no fó sai ba mundu liuhusi Kreda.

Testu ne'ebé ohin propoin mai ita halo parte “ezortasaun ba batizadu sira” ne'ebé mosu iha parte daruak surat nian (kf. Ef 4,1-6,20). Iha ezortasaun ne'e, Paulo foti fali tema tradisionál sira katekeze dahuluk/primitiva nian no konvida fiar-na'in sira atu husik forma tuan moris nian atu asume forma foun, hodi hatais an ho Kristu (kf. Ef 4,17-31), banati tuir Maromak (kf. Ef 4,32-5,2) no hakat husi nakukun ba naroman (kf. Ef 5,3-20).

MENSAJEN

Ilas “naroman” no “nakukun” nian uza iha ne'e, mak ilas ida ne'ebé mosu beibeik iha katekeze primitiva (Kreda foin hahú), hanesan ita haree iha Testamentu Foun, liuliu iha João no Paulo (kf. Jo 1,4-5; 3,19.21; 8,12; 1 Jo 1,5-7; 2,9-11; Rom 2,19; 2 Cor 4,6; 1 Tess 5,4-7). Símbolu “naroman/nakukun” mosu mós, iha hakerek sira Qumran nian atu define Maromak nia mundu (naroman) no mundu ne'ebé kontra Maromak (nakukun).

Ba Paulo, moris iha “nakukun” katak moris dook husi Maromak, lakohi ninia proposta sira, moris atan ba paixun sira no valór falsu sira, iha egoísmu no iha autosufisiénsia. Iha kontráriu, moris iha “naroman” katak simu don salvasaun ne'ebé Maromak oferece, aseita moris foun ne'ebé Nia propoin, hili liberdade, sai “Maromak nia oan sira”.

Sarani sira mak ema sira ne'ebé hili atu moris iha “naroman”. Paulo, husu sarani sira iha parte osidental Ázia Menór nian, atu moris nu'udar Ema Foun, no pratika obra sira tuir opsun ne'ebé sira halo katak, ba “naroman”. Iha konkretu, Paulo husu sira atu sira-nia moris marka ho laran-di'ak, ho justisa, no ho lialoos. Paulo haktuir knananuk/inu sarani batizmál antigu, ne'ebé bolu fiar-na'in sira atu moris iha “naroman” (vers. 14).

Liután: ema sarani la simu de'it bolun atu moris iha “naroman”; maibé tenke denunsia “nakukun” no ninia obra sira, ne'ebé ema sira moris iha “nakukun” halo hanesan egoísmu, moris atan no salan. Sarani ida tenke la'ós de'it hili atu moris iha naroman, maibé mós tenke denunsia hahalok “nakukun” nian, ho forma aberta no desidida.

EVANJELLU – Jo 9,1-41

Iha semana kotuk ita haree ona katak Evanjellu nu'udar João haktuir buka apresenta Jezús nu'udar Mesias, Maromak nia Oan, ne'ebé Aman haruka atu kria Ema Foun. Iha “Livru Sinál” sira-nian (kf. Jo 4,1-11,56), autór apresenta katekeze lubuk ida kona-ba asaun kriadora Mesias nian hodi uza “sinál” bee nian (kf. Jo 4,1-5,47), paun nian (kf. Jo 6,1-7,53), naroman nian (kf. Jo 8,12-9,41), bibi-atan nian (kf. Jo 10,1-42) no moris nian (kf. Jo 11,1-56).

Testu ohin nian mak katekeze datoluk “naroman” nian: liuhusi “sinál naroman nian”, autór deskreve Jezús nia asaun atu kria no fó moris. Katekeze kona-ba “naroman” koloka iha kontestu “Festa Sukkot” (festa ko'a hare/trigu) nian. Ritu populár ida festa ne'e nian mak halakan kandelabru boot haat iha Templu Jerusalém iha parte rezerva ba feto sira.

Sentru kuadru Evanjellu ohin nian mak ema matan-delek ida (aleinde Jezús). “Matan-delek” sira halo parte grupu ne'ebé esklui husi sosiedade Palestina tempu ne'ebá nian. Defisiénsia fízika – tuir teolojia ofisiál – mak rezultadu salan nian.

Tuir hanoin tempu ne'ebá nian, Maromak kastiga tuir salan nia todan. Matan delek tuir rabbi sira tempu ne'ebá nian, mak rezultadu salan grave: moras ida ne'ebé impede ema atu estuda Lei no ida-ne'e malisan ida husi Maromak. Tanba sira nia kondisaun impureza nian, ema matan delek sira labele sai sasin iha tribunál no partisipa iha serimónia relijioza iha Templu.

MENSAJEN

Ita-nia testu mak katekeze ida ne'ebé apresenta Jezús nu'udar “naroman” ne'ebé mai atu leno ema nia dalan. Ema “matan-delek” mak símbolu mane no feto hotu moris iha nakukun. Itania reflesaun fahe ba kuadru oioin.

Iha kuadru dahuluk (vers. 2-5), Jezús apresenta an nu'udar “mundu nia roman”. Jezús no eskolante sira hamriik iha ema delek husi kedas moris mai nia oin. Tuir teolojia tempu nian, sofrimentu mak rezultadu salan nian; tanba ne'e mak eskolante sira hakarak hatene se nia mak sala ka nia aman-inan. Jezús desmonta hanoin ne'e no nega relasaun entre salan no terus. Jezús mós aproveita okaziaun atu hatudu katak misaun ne'ebé Aman konfia ba nia mak sai “mundu nia roman” no hakonu ho “naroman” ema sira ne'ebé moris iha mundu.

Iha kuadru daruak (vers. 6-7), Jezús prepara atu fó “naroman” ba ema delek ne'e. Jezús tafui iha rai, halo tahu ho kabeen no kose tahu ne'e ba ema delek nia matan sira. Jestu ne'e reproduís jestu kriador Maromak nian iha Gn 2,7 (Maromak kumu tahu halo ema). Kabeen, tuir hanoin antigu, trazmite forsa no enerjia vitál rasik (hanesan ho Maromak ne'ebé huu iis ba Adão – kf. Gn 2,7). Jezús nia misaun mak kria Ema Foun hodi nia Espíritu nia kbiit.

Ema la hetan kedas kura: presiza ninia kooperasaun. “Bá fase iha pixina Siloé nian” – Jezús dehan ba nia. Ema delek nia disponibilidade atu obedese Jezús nia orden mak elementu esensiál iha kura no subliña adezaun ba Jezús nia proposta. Referénsia ba hariis iha pixina “enviadu” nian (Siloé signifika “enviadu”) mak aluzaun ida ba Jezús nia bee (Aman mak haruka Nia), bee ne'ebé halo ema sai foun, livre husi nakukun/moris-atan. Komunitade João nian, konserteza, hakarak halo katekeze ida kona-ba batizmu: ema ne'ebé hakarak sai husi nakukun no moris iha naroman, nu'udar Ema Foun, tenke aseita bee batizmu nian.

Autór apresenta personajen oioin ho papél no atitude lahanesan iha kazu ne'e nia oin.

Personajen sira apresenta uluk mak viziñu no ema sira ne'ebé koñese ema delek ne'e (vers. 8-12). Haree ema delek, dependente no inválidu, nakfilak ba ema livre no independente, lori nia maluk sira atu interroga an. Sira hatene katak Jezús mak fó moris nakonu; sira karik hakarak hasoru Jezús maibé la halo ain-hakat definitivu atu hetan "naroman". Ema sira-ne'e maski haree novidade iha Jezús nia proposta libertadora, maibé moris iha baruk no komdizmu, la dispostu atu sai husi sira-nia sikun atu hasoru "naroman".

Grupu seluk ne'ebe mosu iha epizódiu ne'e mak farizeu sira (vers. 13-17). Maski sira hatene didi'ak katak Jezús oferese "naroman", sira prefere kontinua ho eskema "nakukun" nian. Farizeu sira reprezenta ema sira ne'ebé hatene Jezús nia liafoun di'ak maibé lakohi simu. Sira mós opoin eh hanetik "naroman" ne'ebé Jezús oferese no la aseita katak ema ruma hakarak sai husi moris atan ba liberdade. Bainhira sira haree katak ema ne'ebé Jezús kura lakohi fila ba eskema moris-atan nian, sira duni sai nia husi sinagoga.

Hafoin mosu iha kuadru ema delek nia aman-inan (vers. 18-23). Sira rekoñese sira-nia oan delek haree fali maibé evita atu kompromete an. Iha sira-nia atitudo hatudu ta'uk husi ema sira ne'ebé sai atan no la iha barani atu hakat husi "nakukun" ba "naroman". Testu esplika mós katak sira "ta'uk atu duni sai sira husi sinagoga". "Sinagoga" mak fatin comunidade israelita hasoru malu nune'e mós nu'udar comunidade Maromak nian. Duni sai husi comunidade signifika eskomuñan, sai ereje no apóstata, lakon pontu referénsia komunitáriu, sai mesak, lakon fiar husi ema no tau iha ninin. Aman-inan ema delek nian reprezenta sira ne'ebé, tan ta'uk, prefere kontinua iha moris-atan, la provoka dirijente sira eh opiniaun públika, duké aseita Jezús nia proposta transformadora.

Ikusmai, ita ba haree "dalan" ne'ebé ema hetan kura ne'e halo. Molok hasoru Jezús nia prizioneiru "nakukun" nian, dependente no limitadu. Hasoru tiha Jezús no simu "naroman" nia hetan transformasaun graduál no progresiva. Foufoun nia la iha serteza boot kona-ba sé mak Jezús (bainhira ema husu ba nia kona-ba Jezús nia hatán: 'ha'u la hatene'; no bainhira sira husu sé mak Jezús nia hatán: profeta ida"); neineik-neineik nia sai tasak iha fiar. Bainhira dirijente sira konfronta nia no obriga nia atu renega "naroman" no liberdade ne'ebé simu, nia sai ema ida ho serteza no konviksaun, argumenta ho inteligénsia no lais, joga ho ironia, rekuza filafali ba moris-atan: nia hatudu an nu'udar ema adultu, tasak, livre, laho ta'uk... Ne'e tanba kbiit husi "naroman" Jezús fó. Finalmente, testu haktuir estádiu finál dalan progressivu nia halo: adezaun tomak ba Jezús (vers. 35-38). Bainhira hasoru fali nia, Jezús konvida nia atu adere ba "Mane Makso'ik" ("ó fiar iha Mane Makso'ik?" - vers. 35); ema be uluk delek hatudu adezaun totál: "Na'i, ha'u fiar" (vers. 38). Títulu "Na'i" ("kyrios") mak títulu ne'ebé comunidade sarani primitiva hodi bolu Jezús, Na'i glória nian. Testu kontinua hodi dehan katak, ema be uluk delek hakne'ak no adora Jezús: adora signifika rekoñese Jezús nu'udar projetu Ema Foun ne'ebé Maromak apresenta ba ema sira, adere ba Nia no tuir Nia.

Ho modu simbóliku evangelista apresenta katekúmenu nia "dalan" ho ema delek ne'e nia perkursu. Ain-hakat dahuluk mak enkontru ho Jezús; hafoin, katekúmenu hatudu adezaun ba "naroman" no halo ninia deskoberta sai tasak... Ho modu progresivu, nia sai ema livre, laho ta'uk, konfiante; no "dalan" ne'e lori ba adezaun totál ba Jezús, iha rekoñesimentu katak Nia mak Na'i ne'ebé gia istória no soi proposta moris nian ba ema... Ba sarani ida buat ne'ebé interese liu nia mak tuir Jezús.

Jezús nia misaun apresenta iha ne'e mak misaun kriaun Ema Foun. Maromak kria ema atu sai livre no haksolok; maibé egoizmu, foti-an, autosufisiénsia, domina ema nia fuan, dadur nia iha "moris delek" no la tuir Maromak nia projetu. Jezús nia misaun mak halakon "moris delek", liberta ema no halo nia moris iha "naroman", no la'o ba moris nakonu.